

दिनांक : 05.04.2026

समय : 18.45 बजे

## समाचार

- केन्द्र सरकार सगळा नागरिकां ऊं एलपीजी सिलेंडर बुक कराबा खातर डिजिटल तरीका ने काम मांय लेबा अर गैस देबा वाळा रे कने जाबा सूं बचबा ने कयो ।
- उपमुख्यमंत्री दीया कुमारी न्यायपालिका ने लोकतंत्र रो महताऊ अर मजबूत स्तम्भ बतायो ।
- सियाळू विपणन बरस 2026-27 खातर एमएसपी माथे गोहूं खरीद खातर पंजीकृत काश्तकारां रा काल ताई स्लॉट तैय करया जावेला ।

अर

- प्रदेश मांय एक नया पश्चिमी विक्षोभ रा असर सूं काल सूं मौसम मांय फेरू बदळाव रा आसार-13 जिलां मांय तेज आंधी रे सागे बिरखा अर कटे-कटे ओळा पडबा रो अंदेशो ।

000

केन्द्र सरकार देश भर मांय पेट्रोल, डीजल अर रसोई गैस री उपलब्धता बणाया राखबा खातर सगळी कोशिश कर री है। सरकार लोगां सूं एलपीजी सिलेंडर बुक कराबा खातर डिजिटल तरीकां ने काम मांय लेबा अर गैस देबा वाळा रे कने जाबा सूं बचबा ने कयो है। तेल अर प्राकृतिक गैस मंत्रालय रे मुजब फरवरी महीना सूं काल ताई एलपीजी आपूर्ति 53 फीसदी सूं बढ़ र 90 फीसदी व्हे गयी है। मंत्रालय कयो के काल 90 हजार सूं बत्ता पांच किलोग्राम वाळा एफटीएल-छोटा सिलेंडरां री बिक्री करी गई। ये छोटा सिलेंडर नजीक रा एलपीजी वितरक रे कने मुहैया है अर आं ने वैध पहचान पत्र दिखार खरीदयो जा सकेला। इण खातर किंणी भी आवासीय पता री जरूरत नी है। मंत्रालय कयो के मार्च 2026 सूं करीब 3 लाख 60 हजार पीएनजी गैस कनेक्शन दिया गया है। इण रे इतर तीन लाख 90 हजार सूं बत्ता उपभोक्ता नया कनेक्शन खातर पंजीकरण करायो है। वठी ने कच्चा तेल री उपलब्धता माथे केन्द्रीय पेट्रोलियम अर प्राकृतिक गैस मंत्री हरदीप सिंह पुरी कया के भारत ईरान समेत 40 सूं बत्ता देशां सूं कच्चो तेल खरीद रियो है अर ईरानी कच्चो तेल खरीदबा मांय भुगतान सूं जुडी कोई समस्या नी है। श्री पुरी उण रिपोर्टां अर सोशल मीडिया माथे कर्या जा रिया दावा ने खारिज कर्या जिण मांय कयो गयो हो के भुगतान संबंधी समस्यावां री वजह सूं भारत रा वाडिनार सूं ईरानी कच्चा तेल रो एक जहाज चीन री कानी मोड दियो हो। सोशल मीडिया पोस्ट मांय, श्री पुरी इण खबरां ने गलत बताया है। इण बीच पोत, जहाजरानी अर जलमार्ग मंत्रालय कयो के सगळा भारतीय नाविक सुरक्षित है अर लारला 24 घंटा रे दौरान भारतीय झंडा वाळा किंणी भी पोत रे सागे किंणी कठिनाई री सूचना नी है।

000

प्रधानमंत्री नरेंद्र मोदी राष्ट्रीय समुद्री दिवस रे मौके कया के राष्ट्र आज आपरी समुद्री विरासत अर इण हलका सूं जुड़या सगळा मिनखां रा योगदान ने याद कर रियो है। सोशल मीडिया माथे एक संदेश साझा करता थकां श्री मोदी कया के इण हलका मांय लोगां रो योगदान देश री माळी व्यवस्था, व्यापार

अर संपर्क ने मजबूत करबा री कानी समर्पित रियो है। वे कया के आज भारत रो समुद्री हलको तेज गति अर ऊर्जा रे सागे आगे बढ़ रियो है।

मुख्यमंत्री भजन लाल शर्मा भी राष्ट्रीय समुद्री दिवस रे मौके देश री समुद्री सीमावां रा सजग प्रहरी अर नागरिकां ने नमन करयो है। सोशल मीडिया पोस्ट माथे वे कया के आज समुद्र केवल देश री सीमा नी बल्कि उण री समृद्धि रो महान दरवाजो बण रियो है।

000

उपमुख्यमंत्री दिया कुमारी कयो के न्यायपालिका लोकतंत्र रो एक महताउ अर मजबूत स्तंभ है। वे आज भीलवाड़ा मांय जिला अर सत्र न्यायालय रा नया भवन री नींव राखबा रा कार्यक्रम मांय खबरनवीसां सूं बातचीत मांय कयो के 62 बीघा जमीं माथे बणबा वाळा इण नया भवन सूं न्यायिक कामां मांय तेजी आवेला, जिण सूं जनता ने राहत मिलेला।

इण मौके राजस्थान हाईकोर्ट रा कार्यवाहक मुख्य न्यायाधीश संजीव प्रकाश शर्मा समेत केई न्यायाधीश मौजूद रिया। वठी ने भूमि पूजन रे सागे जिला बार एसोसिएशन रा नया निर्वाचित पदाधिकारियां रो शपथ ग्रहण कार्यक्रम भी राख्यो गयो।

000

प्रदेश मांय बिरखा रा पाणी ने इकट्ठो करबा रा लगस सूं चलाया जा रिया मुख्यमंत्री जल स्वावलंबन अभियान सूं हजारू गांव रा लाखूं पिरवारां ने राहत मिलेला। राज्य सरकार जल संकट सूं जूझ रिया सगळा गांवां ने चरणबद्ध तरीका ऊं पाणी रा मामला मांय आत्मनिर्भर बणबा मांय जुटी है। पेश है एक रपट—

000

राज्य सरकार सियाळू विपणन बरस 2026–27 खातर एम.एस.पी. माथे गेहूं खरीद रा नुवा दिशा—निर्देश जारी करया है। इण नियमां रे तैत गेहूं री खरीद अबे गिरदावरी मुजब व्हेला अर काश्तकारां खातर स्लॉट बुकिंग बन्दोवस्त भी जरूरी कर्या गया है। सगळा पंजीकृत काश्तकारां रा काल तांई स्लॉट तैय करया जावेला। पंजीकरण प्रक्रिया रे दौरान काश्तकार 31 मई तांई आपरी पसंद रा किंणी भी हफता रो चुणाव कर उपज खरीद केन्द्र माथे बेचबा खातर ला सकेला। लारला बरसां री भांत टोकन अबे खरीद केन्द्र री कानी ऊं जारी कर्या जावेला, जिण मांय क्षेत्रीय कार्यालय री मंजूरी व्हेला। इण बीच, प्रदेशभर मांय खरीद केन्द्रां माथे गेहूं खरीद खातर बत्तो बन्दोवस्त करया गया है। खरीद प्रक्रिया 30 जून तांई चालेला।

000

कृषि अर किसान कल्याण मंत्री शिवराज सिंह चौहान कया के बेमौसमी बरसात अर ओळा पड़बा सूं पीड़ित काश्तकारां ने चिन्ता करबा री जरूरत नी है। वे कया के सरकार हालात माथे निजर राखर काश्तकारां रा व्हीया नुकसान रो जायजो लेबा खातर राज्या रा कृषि मंत्रियां रे सागे विगतवार चर्चा करेला। श्री चौहान कया के हालात रा जायजा रे पछे चावता कदम उठाया जावेला।

000

प्रदेश रा केई हलकां मांय पश्चिम विक्षोभ रा असर सूं लारला दिनां भी बिरखा सूं बत्ती ठौड़ां माथे तापमान मांय गिरावट दर्ज करी गयी है। जोधपुर जैसलमेर, बीकानेर, अजमेर अर जयपुर समेत केई ठौड़ां माथे पारां मांय गिरावट दर्ज करी गयी। मौसम मेहकमां रे मुजब मौजूदा सिस्टम रो असर आज कुछ कम रहवेला। मौसम केन्द्र जयपुर रा निदेशक डॉ. राधेश्याम शर्मा बताया के काल सूं एक नया पश्चिमी विक्षोभ रे सक्रिय होबा सूं मौसम मांय बदलाव व्हे सके है।

000

प्रदेश रा न्यारा—न्यारा शहरां मांय कड़ी सुरक्षा रे बीच आज सूं दो दिन री एसआई भर्ती परीक्षा—2025 सरू व्ही। आज पहला दिन अजमेर रा न्यारा न्यारा परीक्षा केन्द्रां रो राजस्थान लोक सेवा आयोग रा सचिव रामनिवास मेहता औचक जायजो कर्यो। अलवर मांय भी परीक्षा केन्द्रां माथे परीक्षार्थियां ने कड़ी जांच रे पछे दाखिलो दियो गयो। बतायो जावे है के आरपीएससी री कानी ऊं राख्यी इण परीक्षा खातर राज्यभर मांय 1 हजार 174 परीक्षा केन्द्र बणाया गया है। परीक्षा मांय 7 लाख 70 हजार परीक्षार्थी पंजीकृत है। परीक्षा दो पारियां मांय सुंवारे 11 सूं 1 बज्या अर दोपहर 3 सूं 5 बज्यां तांई व्हेला।

विज्ञान अर प्रौद्योगिकी राज्य मंत्री जितेंद्र सिंह आज नई दिल्ली मांय साधना सप्ताह रे तैत केई पहलां री सरूआत करी। इण मांय उन्नति पोर्टल अर कर्मयोगी कर्तव्य कार्यक्रम री राष्ट्रीय स्तर माथे कार्यान्वयन री रूपरेखा भेळी है। डॉ. सिंह एक विशेष सत्र मांय कया के मिशन कर्मयोगी पांच बरस पूरा कर लिया है। ओ सरकारी कर्मचारियां री क्षमता निर्माण मांय महताऊ प्रगति रो प्रतीक है। वे कया के दो सूं आठ अप्रैल तांई मनायो जा रियो साधना सप्ताह सरकारी अहलकारां रे बीच लगातार सीखबा री संस्कृति ने मजबूत करबा अर कौशल ने बढ़ाबो देबा रो लक्ष्य राखे है।

000

रेल मंत्री अश्विनी वैष्णव नई दिल्ली रेलवे स्टेशन माथे आवती पीढी री अमृत भारत रेलगाडियां रा डिब्बां रो जायजो करयो। रेल मंत्रालय कयो के इण डिब्बां ने यात्रियां रा आराम खातर सोच-समझर डिजाइन करयो गयो है। मंत्रालय बतायो के इण डिब्बा ने खास तौर री थीम माथे सजायो गयो है। इण मांय पीवीसी फर्श, सीट अर बर्थ **रैग्जीन**, स्नैक्सटेबल, परदा अर शौचालय हलका मांय खास रंग काम मांय लिया गया है। मंत्रालय बतायो के इण डिब्बा मांय काम मांय ली गई सामग्री जोखिम स्तर-3 अग्नि सुरक्षा मानकां रे मुजब है।

000

दुनियाभर मांय आज ईस्टर मनायो जा रियो है। इण मौके प्रार्थना, पश्चाताप अर प्रभु यीशु मसीह रा जीवन रा आखिरी फेर ने याद कर्यो गयो। राष्ट्रपति द्रौपदी मुर्मु अर प्रधानमंत्री नरेन्द्र मोदी ईस्टर रे मौके देशवासियां ने शुभकामनावां दी। प्रदेश मांय जयपुर, अजमेर समेत न्यारी-न्यारी ठौड़ां माथे ईस्टर रो तिवार श्रद्धा और उच्छाव सागे मनायो गयो। वटी ने प्रदेश मांय वैशाख चतुर्थी रो पर्व पारम्परिक धार्मिक आस्था रे सागे मनायो जा रियो है। सवाईमाधोपुर जिला मांय चौथ का बरवाडा रा चौथ माता मिन्दर मांय सुंवारे सूं सिरधालू पूग रिया है। महिलावां चौथ माता रा दर्शन कर व्रत री कथा सुणी। मिन्दर मांय दर्शन करण रो सिलसिलो चांद दीखबा तांई चालेला।